



REPUBLIKA E SHQIPËRISË
-AUTORITETI I KONKURENCËS-
Komisioni i Konkurrencës

V E N D I M

Nr. 54 Datë 04.09. 2007

Mbi

Njoftimin e përqendrimit të realizuar nëpërmjet shitblerjes 76% të aksioneve në Albtelekom Sh.a tek Çetel S.A”

Komisioni i Konkurrencës me pjesëmarrjen e :

- Znj. Lindita Milo (Lati) Kryetar
- Zt. Lush Përpali zv/kryetar
- Znj. Servete Gruda Anëtar
- Zt. Koço Broka Anëtar

Në mbledhjen e tij të datës 04.09.2007, shqyrtoi çështjen me :

Objekt: Njoftimi i datës 25 Qershor 2007, për përqendrimin e realizuar nëpërmjet shitblerjes të 76 % të aksioneve të shoqërisë Albtelekom Sh.A tek Çetel S.A.

Baza ligjore: Ligji nr. 9121, datë 28.07.2003 “Për Mbrojtjen e Konkurrencës”, neni 24, shkronja d, nenet 10-12, në veçanti Kreu III “Përqendrimet e Ndërmarrjeve” nenet 53-56, 58, Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit dhe mundësinë për njoftim të thjeshtuar” dhe Formulari “Për njoftimin e Përqendrimit”.

Komisioni i Konkurrencës, pas shqyrtimit të njoftimit të përqendrimit,

V Ë R E N S E:

1. **Albtelekom**, shitësi i pjesës 76 % të kapitalit aksioner është shoqëri anonime me kapital 100% shtetëror, me seli në Tiranë, Shqipëri, me aksioner të vetëm METE. Albtelekom ushtron veprimtarinë sipas legjislacionit shqiptar, me një licensë shërbime publike të

telekomunikacioneve për një periudhë 15-vjeçare. METE, është pronari dhe përfituesi i vetëm dhe i ligjshëm i paketës prej 11.400.00 aksione në shoqërinë “Albtelekom”, me vlerë nominale për aksion 1 000 Lekë dhe në mënyrë të tërthortë i shoqërisë Eagle Mobile. Albtelekom është operatori publik që vepron në tregun e shërbimit të telefonisë fikse, i licensuar nga ERT për ofrimin e shërbime lokale, kombëtare dhe ndërkombëtare për abonentët e rrjetit të tij dhe njëkohësisht ndërlidh (interkonekton) dhe mbështet operatorë të tjerë të tregut të telekomunikacionit; për ofrimin e shërbimit internet si ISP Kombëtare; si operator Backbone.

Albtelekom, ka lidhur marrëveshje interkoneksioni me operatorët mobile AMC dhe Vodafon, me operatorët për ofrimin e shërbimit të teleinformacionit (OSHT), Ofruesit të Shërbimit me kartë të parapaguar (OSHKP).

Eagle Mobil, filial i Albtelekom, shoqëri aksionare, e zotëruar plotësisht (100%) nga Albtelekom, e themeluar nga Albtelekom, e rregjistruar në bazë të Vendimit Nr 30436, datë 24 Tetor 2003, të Gjykatës Tiranës dhe e licensuar në bazë të licensës Nr 253/03/04 datë 1 Mars 2004, për të ofruar shërbim publik të lëvizshëm, tokësor, sipas standartit GSM. Licensa e shoqërisë “Eagle Mobile” është shtyrë 3 herë me një 12 muaj dhe licensa aktuale përfundon në Mars 2008.

2. **ÇETEL A.S**, është aksioneri/blerësi i pjesës 76 % të kapitalit të paketës së vetme të përbërë nga 11.400.000 aksione në Albtelekom, me vlerë nominale për aksion 1000 Lekë, përfaqësuar nga zt. Ahmet Çalik.

ÇETEL është shoqëri anonime e themeluar dhe e krijuar sipas ligjeve të Republikës së Turqisë, pjesë e grupit Çalik Holding.

Çalik Holding është i pranishëm në tregun bankar shqiptar, si aksionar/zotëruar i pjesës 60% të kapitalit aksionar në Bankën Kombëtare Tregtare, nëpërmjet . Çalik Seker.

ÇETEL A.S nuk ka veprimtari ekonomike në Shqipëri. ÇETEL ka nënshkruar marrëveshje ortakërie dhe menaxhimi me shoqërinë Turk Telekomunikation.

Turk Telekomunikation A.S e krijuar sipas ligjeve të Republikës së Turqisë, me qendër në Ankara, Turqi, ushtron veprimtari në fushën e telekomunikacionit si për ofrimin e shërbimit me shumicë dhe pakicë zanor. Turk Telekomunikation A.S do të asistojë ÇETEL përse i përket manaxhimit të Albtelekomit për kryerjen e shërbimeve të telefonisë fikse dhe GSM, manaxhimit dhe vënies në funksionim të infrastrukturës së telomunikacionit për të gjitha segmentet e linjës fikse/tokësore në tregun kombëtar.

3. Për vitin 2006, xhiro e palëve pjesëmarrëse në transaksion është:

- në tregun ndërkombëtar xhiro totale Çalik Group është 103.946 miliard lekë, nga ku:

➤ **Çalik Holding** **99.002 miliard lekë**

- **Çalik Seker** **4.944 miliard lekë**
- **ÇETEL S.A** **0 USD / 0 lekë**

- në tregun kombëtar e Albtelekom Sh .A është 11.424 miliard Lekë.

1. Pjesa e tregut që zotëron në tregun kombëtar Çalik Holding (Çalik Seker dhe Çetel, pjesë të Çalik Holding) para përqendrimit është 60% . Ndërsa pas bashkimit, pjesa e tregut në zotërim të Çalik Holding, përfaqësuar nga (Çalik Seker dhe Çetel) respektivisht do jetë 60% dhe 76%..
2. Transaksioni i realizuar nëpërmjet shitblerjes të paketës 76% të aksioneve nga Çetel S.A, përbën një përqëndrim në kuptimin e nenit 10, pika 1 shkronja a e Ligjit, si dhe përmbush kushtet për të qenë subjekt i shqyrtimit nga Autoriteti i Konkurrencës në përputhje me nenin 12, pika 1 të Ligjit.

4. Tregu përkatës

a) Tregu i produktit:

➤ **Në tregun e telekomunikacionit:**

- Shërbimi telefonik automatik,
- Shërbimi internet,
- Shërbimi telegrafik,
- Shërbimi i ISDN,
- Shërbimi me kartë të parapaguar,
- Interkoneksioni,
- Dhënia me qera të tretëve, e qarqeve dhe linjave telefonike,
- Shërbime që realizohen përmes postës,
- Mirëmbajtja dhe mirëfunksionimi i linjës telefonike të abonentit, dhe

➤ **Në tregun bankar** (ofrimi i shërbimeve bankare)

b) Tregu Gjeografik: Tregu kombëtar.

Shoqëria Albtelekom Sh.a operon me seli qendrore në Tiranë dhe të ndarë në 13 rajone që mbulojnë 25 zona në të gjithë territorin.

Banka Kombëtare tregtare shtrihet nëpërmjet degëve të saj në 16 qytetet më kryesore të Shqipërisë.

Megjithëse palët pjesëmarrëse në përqëndrim ushtrojnë veprimtarinë e tyre në të njëjtin nivel tregu të ofrimit të shërbimit, në tregun kombëtar, por duke qënë se shërbimet i përkasin tregjeve të ndryshme (financiar

dhe telekomunikacion) nuk kemi të bëjmë me tregje të prekura; po për këtë arsye palët pjesëmarrëse në përqendrim nuk janë të integruara vertikalisht dhe horizontalisht në tregun e ofrimit të shërbimit.

6. Vlerësimi i impaktit në konkurrencë

1. Tregu i ofrimit të shërbimit të telefonisë fikse është shumë i përqendruar. Albtelekom gëzon një pozitë dominuese në ofrimin e shërbimit të telefonisë fikse. Nëse i referohemi strukturës së tregut për vitin 2006 rezulton se Albtelekom zotëron 88 për qind të tregut të telefonisë fikse. Rreth 12% e tregut zotërohet nga 49 operatorë ruralë të licensuar nga ERT. AK në bashkëpunim me Rregullatorin(ERT) do të vazhdojë të monitorojë sjelljen e shoqërisë si pasojë e pasjes së pozitës dominuese në treg për të siguruar zbatimin e ligjit “Për Mbrojtjen e Konkurrencës”.
2. Në tregun e telefonisë së lëvizshme, shoqëria Albtelekom Sh.A përfaqësohet me anë të filialit Eagle Mobile, i cili nuk ka filluar akoma veprimtarinë(. Realizimi i përqendrimit dhe aktivizimi i “Eagle Mobile” pritet të rrisë ndjeshëm konkurrencën në këtë treg
3. Në tregun e shërbimeve për ofrim interneti, ADSL dhe modem, Albtelekom do të monitorohet për sjelljen në tregun e shumicës (wholesale). Ndërsa në tregun e shërbimit me pakicë (të përdoruesit të internetit) Albtelekom zotëron 25% dhe ky treg është i hapur për konkurrencë si pasojë e numrit të licensave të dhëna dhe penetrimit të ulët të shërbimit të internetit në tregun shqiptar.
4. Shoqëria përfituese e kontrollit, CETEL dhe Albtelecom, pjesëmarrëse në përqendrim nuk janë të integruara vertikalisht dhe horizontalisht në tregun e ofrimit të shërbimit.
5. Palët veprojnë në tregje të veçanta të produktit dhe ato gjeografike dhe nuk kanë klientë të përbashkët për ofrimin e shërbimeve të tyre.
6. Blerja e Albtelekom do të rrisë investimin, zgjerimin e rrjetin, penetrimin në zonat rurale dhe do të bëjë efikase shoqërinë Eagle Mobile duke rritur konkurrueshmërinë në tregun e telefonisë së lëvizshme.
7. Autoriteti i Konkurrencës do të monitorojë në vazhdimësi tregun e telekomunikacioneve në dy drejtime: të strukturës, mbasi raporti i përqendrimit të tregut të telefonisë fikse është shumë i lartë, si dhe të sjelljes të ofruesve me fuqi të ndjeshme në treg për të shmangur abuzimet e mundshme me pozitën dominuese apo praktikat e bashkërenduara që çenojnë konkurrencën, ndërmjet operatorëve aktualë dhe atyre potencialë.
8. Si konkluzion, transaksioni i njoftuar konsiston në përfitim të kontrollit të 76% të kapitalit aksionar në Albtelekom nga ÇETEL, dhe nuk krijon ose forcon pozitën dominuese të shoqërisë së re pas përqendrimit.

PËR KËTO ARSYE

Në bazë të nenit 24, shkronja d, dhe nenit 56 pika 1 të Ligjit nr. 9121, datë 28.07.2003 “Për Mbrojtjen e Konkurrencës”:

VENDOSI:

Të autorizojë përqëndrimin e realizuar nëpërmjet shitblerjes së 76 % të kapitalit aksioner të Albtelekom Sh.A tek Çetel S.A, me qendër në Stamboll, Turqi.

Ky vendim hyn në fuqi menjëherë.

KOMISIONI I KONKURRENCËS

Lush Përpali

(_____)
Zv/Kryetar

Servete Gruda

(_____)
Anëtar

Koço Broka

(_____)
Anëtar

Lindita Milo (Lati)

K R Y E T A R